

T 3133 / 3276.83

8

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
MAY 31 1939

河間府新志卷之十二

哈佛大學漢和
圖書館珍藏印

人物志

敘曰行各以其所長而事乃著焉逸民獨行文苑之
目所以備於史官也若此諸科郡亦不乏今分其倫
類區歸各門凡在於古而舊未嘗討蒐者亦補入焉
其濫而登者則剔其龐蕪爲孝友忠節吏師高行文
學隱逸伎術仙釋寓賢凡九等列而敘之夫世各尚
其所貴故託華閎者美名多易歸儕俗好畧其所輕
故出微下者抱節或難著彼隸卒僮僕非無傑然苟
鄙爲不足述斯亦挾見之陋也能執干戈以衛社稷

宣父詎云勿殤蒼頭李善而史紀之知獨行之難泯
有旨哉有旨哉故於肅寧之守忠節書侯振東於趙
遵譜之歸高行書李晉福

孝友

戰國

肥生烈趙人也家於河關父爲趙都尉秦已滅趙都
尉獨守一城未下秦將攻殺都尉生烈欲報仇毀
面垢服間行入秦秦人獲之置鼎將烹生烈瞋目
流血引匕首摘秦將僅不中躍入鼎死

地理考河關在阜城弓高間北魏時尚有河關

之名

北魏

李伯貴蓀人棠之祖也官魯郡守有孝行居喪哀毀
遂卒宣武嘉之贈渤海相

邢晏巒之弟篤於義讓初爲兗州例得一子釋褐乃
啟其弟子子慎爲朝請後爲滄州復引孤兄子昕
爲主簿而不私其子世以此稱之

北齊

楊慶河間鄭人祖元父剛再世並以至孝知名慶二
十五舉孝廉以侍養不赴其母有疾衣帶不解者

七十日及卒哀毀骨立齊文宣表其門

唐

劉君良河間四世同居族兄弟並相友愛閨門以內
斗粟尺帛無私焉隋大業末天下荒饉君良妻勸
其別居先是君良家庭樹有鳥巢鳴聲甚和其妻
欲感君良異意乃潛令人覓他禽着樹間於是鳥
雛合鬪家人怪之其妻因曰天下大亂禽鳥尚不
相容況人乎後君良知妻所爲斥之曰爾破吾家
卽遣去與兄弟同居如故時盜賊並起鄉人依之
以居共築堡自守因號義成堡唐武德中深州別

駕楊弘業至其居凡六院共一庖子弟皆有禮節
因嘆息而去德宗貞元六年旌異其門閭

劉宣董永朱寶三人者籍瀛州皆數世同居自北齊
歷周隋唐凡四代而孝友無替朝廷優異復其賦
稅賜粟帛表門閭州縣數存問焉

宋

李璘河間人晉開運末契丹犯邊有陳友者乘亂殺
璘父及其家三人時璘弱未能報也至宋太祖乾
德初璘爲殿前祇候友爲軍校相值於京師璘手
刃友自言於官按驗得狀信爲父復仇有司論當

死太祖壯而免之

李罕澄阜城人同居者七世矣自漢乾祐中已詔有司改其鄉名加之旌異宋太平興國中同居如故復詔褒表之

高性鄭州人八世同居宋真宗表之蠲其課調

元

段文瑞河間人讀書奉母盡孝母歿毀甚匍匐行數里外負土營墓百五十日而後成事聞於朝授本路學正以旌之

明

劉敏肅寧人以孝行著洪武時以人才舉爲中書吏時以小車出市葦荻使其妻織席鬻之以養母時有沒官女子可得爲婢者或說敏勤苦其妻如此何如以一婢給事少減勞劬敏曰事親乃子婦事他人何與乎敏官王府錄事以徽州同知終

舊志不載劉敏通志載之其以敏爲洪武時舉人則誤也

侯秀故城人幼孤繼母何偏愛已生遇秀甚酷秀孝事唯謹何死爲廬墓側携弟妹居焉後弟溺於水秀哀不已善撫其妹行感鄉里人呼秀所居爲孝

村

李華先亦故城人親死廬墓側常大雨火滅絕食二日華先家有犬適來其所因書無火字繫犬上犬歸家人乃知之墓左有井舊水味苦至是變爲甘泉衆謂其行所感

崔鑑獻縣人父瑋以工部主事出使卒鑑聞訃卽日奔赴躬輓車歸葬廬於墓左者四年有司奏旌其門

王泰獻縣人親歿廬墓三年朝夕哭泣久而不衰

鄭本阜城人爲諸生幼喪父母其祖母撫之本與弟

立友愛特甚財無所私及祖母卒哀痛備至路人皆感焉與本同縣傅海霖者有孝名其異母兄貧海霖養而葬之

馬僊肅寧人以孝聞親喪日夜哀號不已廬墓三歲不肯還鄉人共強迎之乃歸後爲巡檢一日語人吾將逝矣正冠而卒

杜蕙任邱人舉進士爲麗江太守歸而隱居不入城市事父母至孝父卒三年廬墓母卒時年九十九蕙亦已八十有二矣時交河于欽順天丁丑進士親亡亦廬墓

褚環交河人家世農人也至環讀書領鄉薦初環父
日事田作環念父勞苦代之躬耕父卒廬墓側交
河令欲告上官而表之環固辭乃止後知陝西長
安縣

朱時泰交河人親死廬墓一日縣令過其地方大雪
見朱獨居問知之乃告於提學副使列之諸生而
與時泰同縣稱廬墓者又有尚霑

黃文任邱人其父名鉉者本江西新喻人也永樂中
娶任邱孫氏遂生文方一歲鉉出爲賈於鄧州州
有李千戶更以女妻鉉鉉留不歸及文長其母使

就學爲諸生一日問父所在母具告之文欲尋求
未知鉉所在後文貢入太學有同舍王生者鄧人
也與文相得而窺文意常戚試請之文不覺泣下
曰心所恨者若是耳王生因言吾州李千戶有婿
姓名與君之父正同得母是乎文卽歸告其母往
鄧求之良是然鉉不肯與文偕來後數年文得通
判兗州至官所具輿服遣人迎鉉鉉乃就文養與
故妻俱老矣

鉉雖娶於任邱孫氏則未知其爲居於此乎或
亦常歸婦於江西而更出乎若然則恐未得以

文爲任邱人此旣不可知而舊志通志皆載文
事乃仍之特二志所記殊畧復採李時敘文者
以補焉

王業惇任邱人崇禎丙子舉人端謹有至行以孝聞
微時教授二十里外其母有疾日則就館夕必徒
步歸侍者歲餘崇禎戊寅之亂業惇掖其父避兵
身中流矢入骨寸餘不知痛閱三年鏃自肉間出
亦無所傷後爲縣令歷州守有績

葉應元任邱人性至孝隱居不仕萬歷三十五年邑
中大水將灌城北夜或見有炬火從東方來呼曰
此葉孝子所居城不可犯也水遂退

李宸任邱人事父母至孝親卒廬墓者三年有盜過
之相戒曰此孝子廬勿犯也宸後以明經仕幾百
歲乃卒

趙敏任邱人母老且病與其妻朝夕侍養甚至敏子
俊事敏亦孝敏病甚便溺狼藉俊以手承之無怠
色曰子職當如是也

劉端吳橋人與其妻竭誠事母母歿擔土築墓日不
再食哭聲達於路及墓成人指爲孝子墳其他以
廬墓稱者寧津劉獻景州李海慶吳橋段興故城

李寵秦綸綸蓋有芝草瓜實之應

謝廷瓚任邱人事寡母四十餘年無少怠母年九十
四瓚七十矣戊寅之變瓚與其妻徐擁衛老母以
俟於家寇兵至感其誠孝不加害而去

楊賓任邱諸生也善事寡母母卒賓貧甚僅得三金
買棺葬焉及將死屬其子爲已報母棺母許逾三
金其子不忍欲稍益價將市矣賓聞之怒卽叱止
之子乃從之

息隆泰東光諸生也方明季世隨父官文安訓導值
亂兵至與父俱出避遇兵方殺人隆泰身已被創

尚勉負父走匿深林中流血數升隆泰竟死

鄭杲者東光人五世同居家百餘口置田二萬畝以
贍之

高潭景州人諸生出於庶其嫡母亡哀毀甚至事生
母王亦如之朝夕扶養不敢怠州守前後旌其行
王加祿年十三父死其繼祖母出其母並逐去加祿
貧寡失所依備歷苦辛加祿竊從人學讀書稍長
能爲童蒙師教小學以養母崇禎中詔舉德行有
司以加祿應授禮部儒官

袁木河間衛人幼與其母隨外祖官於陝西路經潼

關母死遂藁葬焉外翁歸而勿能遷也及木長知母死狀徒步至陝求知其地已爲人所田竟不知處木號泣數日億甚而卧若有人爲指殯所遽起尋得焉遂負骸骨丐食於路以歸葬

高鐵者其名曰恕亦河間衛人性至孝人憚其方嚴少欵曲以鐵呼之

周可畏任邱人明末時携二子及異母妹避兵途中聞兵且至可畏棄二子負妹以歸其母問孫安在乎可畏曰不得已姑棄之矣母痛欲絕明日兵去可畏往視之二孺子啼於草間無恙也

王通宣德初時寧津人也事母至孝母病思鷄炙求之不得忽自謂人肝似鷄因取刀剖腹欲探肝炙之痛昏而仆恍惚聞人語遂甦而肝在焉乃令其妹炙以進母母病遂愈通亦竟無恙

回滿住東光人奉祖母劉至孝永樂初負劉詣京師求佛劉病於途滿住割股食之病良已外此以割股著聞有河間人榮天祿寧津人撒金吳橋人李弘及河間衛人李瀛此五人者唯回滿住獨旌

寧津志云舊載王通剖肝撒金割股縣令程裕昌以其善教不可訓特存其名而削其事可爲

達於理矣

國朝

周永泰吳橋人生明末父死亂軍時永泰行求父屍不避危險竟得之以歸殮葬如禮事繼母孝推先世田宅悉與其弟焉

王詔慶河間人天津衛學諸生也其弟廷慶以事繫獄中廷慶時尚無子詔慶憫之請於官願以身代弟囚官詰其故憐而許焉會赦至與弟俱得免

呂建陽景州農人也年十九父卒廬於墓所冬月大雪一人獨居有乞者過之掠其衣去建陽凍幾死

母兄聞之呼使歸不肯喪畢其弟又亡弟妻更嫁一女始生留之而去建陽使已妻乳之妻後怨怒與建陽時時爭乃白於母出之躬爲傭伐柴鬻錢養母云

賈錫穎景州人順治六年有王小庭者起爲盜夜入賈氏殺穎父與其伯父兩人及穎祖母皆死焉穎時方十四匿隱處得免心識其爲小庭也弱不能報時時痛於中後小庭受撫歸里中見穎輒侮之曰汝當德我異時我若并殺汝安得至今穎佯謝之小庭心易穎不爲備後里中爲社樂神觀者異

集穎伺小庭飲於肆潛携利刃入自其背刺之刃洞胷腹間小庭仆穎斷其首抉其心持奔墓所祭其父隨自言於官官問縣人具言小庭實常殺賈氏四人穎今乃報仇於是釋穎

高基景州人性孝友與弟捷皆有內行捷出爲伯父後所後母遇捷頗厲或長跪終日不使之起不敢起也劉知其孝亦稍改焉

陳琬景州諸生早孤及長推祖所授產悉讓諸兄伯兄旣亡事寡嫂尤恭謹有禮

張一舉獻縣人去爲道士而事母甚孝母死廬於墳

左者二年邑人李正華過而感焉以詩贈一舉云
一個黃冠知報恩三年廬墓意勤勤安得人人盡
如此世上誰爲不孝人

蕭升元肅寧人年二十許時父病篤升元泣且計祖父母皆老弟妹各幼所恃唯父設病死當何如乃沐浴往禱於神請以已代父死未幾父果愈而升元疽出於口遂卒康熙五十七年也

張義肅寧村人也繼母章性殘妬私愛其子而虐義及義妻常置毒食中義幸不死復持斧砍義肩創甚又予之絕令自爲計義知其意不可回乃夜之

林中欲自縊或見樹間有光往視之問義知狀復不得死衆爭爲不平義妻家將訟章義再三止焉後章卒逐去義夫婦不得已携妻爲人賃春數日必歸視章後數年章所生子敗其父田宅盡日且寒餓義則以傭錢時給養之未幾章子死無依乃召義歸義奉事之十餘年而死義因以孝稱

熊廷賓河間人崇禎壬午大兵破河間廷賓時方八歲其母羅氏被擄北去及廷賓長爲諸生是時國朝已定鼎燕都十年矣廷賓日夕思其母私計當在京師乃往徧求之果在某所然不得脫必

重金贖焉貧無以具號泣都市中都人有郭姓者好義人也見之憐其孝慨然曰當爲子謀此舉二百金子廷賓卒贖母歸

諸生劉纘宗東光人明兵備副使佳禎子也佳禎官甘肅遇亂死焉纘宗棄家室往求父骸至秦中時流賊尚熾爲所獲迫使從賊纘宗爲賊言所以因涕泣賊義而勿害縱之行纘宗至甘州勢不能歸乃葬父其地廬墓焉哀毀而死秦人蔣名禮率衆窆纘宗其父塚傍立石以紀之

白惺涵河間人崇禎壬午歲河間城破惺涵與父印

奇並爲寇兵所執見印奇貌豐偉疑其富人索萬金來贖不能應將刃之惺涵痛哭解衣伏父身求代死乃并捨之惺涵後於順治己丑成進士爲吏部郎

賈正士河間人郎中雒英長子也侗儻有雄畧爲人坦白不設城府父病旬餘醫藥罔效士晝夜涕泣寢食俱廢禱於北辰願以身代詰朝有以喻化方授者一服而愈咸以爲孝感所致云子斌邑諸生因病喪明事父母極孝其繼母戴賢而慈撫之無異已出斌年六十餘戴寢疾猶爲嘗藥衣不解帶者數十日

馬廷宣東光拔貢生善事繼母其兄客死廷宣往扶柩歸有宗妹爲人所畧賣出資贖嫁之

李魁春任邱人善事繼母時人號之爲李子騫方明末荒甚出粟二千石周鄉黨康熙三十二年祀之於鄉

王性剛吳橋人素孝謹家貧父歿不能喪鬻身市棺以葬其父由此稱邑中

孫守才吳橋人嫡母李氏年九十二矣卧病不起者幾三年李有子六人不與母同居守才獨奉生母

何氏以孝養嫡母其次兄早亡遺寡嫂唐氏守才亦養之守才本農人未嘗知書僅足衣食然孝思誠篤內行雍雍有士君子風

王作肅號復園吳橋人父歲貢孫錫范文忠公甥也孫錫幼孤依舅成立及文忠殉節無後爲之經理其家擇嗣以繼著述多散失作肅力爲搜校傾囊刊行以表忠烈成父志焉母郭氏早卒繼母鄭撫養成立作肅事之如所生康熙乙卯膺鄉薦就教職戊辰遭父喪哀毀骨立服闋選滑縣教諭旋以繼母鄭疾力請終養未之家而訃音至千里哀號

路人皆爲感泣服除補南宮方葬父啟郭氏柩痛已之不逮養也拊棺一慟絕而復蘇其至性過人如此與異母弟作哲友愛如手足作哲早卒一子亦死作肅甫生孫卽以繼之平生善吟咏著復初齋稿若干卷立教以窮理敦倫經濟博雅爲務所屬士風咸振當司鐸於滑留子履吉侍養繼母鄭以孫兼子克盡孝道履吉辛卯科舉人工詩善墨竹能世其家

白郢河間諸生性篤孝友母亡三年不入卧內侍其父朝夕甚謹父所飲食必躬治之後喪畢父使還

內郢侍父如故及父歿哀毀彌至執喪禮尤嚴郢
生平與人必以誠信雖乞人亦知之

王之銳河間人始以拔貢爲廣東令改廣文乾隆初
有薦之者授國子助教之銳爲人性孝友親喪三
年不入卧內不飲酒食肉其爲令歸所携皆以奉
兄又推己宅與之之銳好學雖老不倦國子生無
不敬者至壬申歲年已八十矣尚與諸生講論不
倦云

邊霖任邱諸生生平誠朴以教授爲事邑弟子從者
至衆隣里皆敬而愛之雍正中有欲以孝廉方正
舉霖者霖辭曰吾早失父母奉事缺矣得稱孝乎
吾方貧居少所交接卽欲不廉而不可得也安稱
廉乎力辭止之

孟允中任邱人託經營爲業獨善事其母自外歸必
爲兒童嬉戲以祈母懽後母病痢下醫者云糞甘
則死苦尚可活允中卽嘗之已而母死允中哀痛
不踰月亦卒

高隆任邱人父病禱於神願以身代已而父瘳踰年
而隆卒

王悅河間人性孝友親沒能盡哀兄有疾事之甚至

康熙戊子舉於鄉爲遵化州學正教士以誠勤於
誨導士咸服云

劉執玉河間萊傭也然孝於母雖資計貧甚日必以
甘旨奉而糠粃自食其妻張亦能循婦節與執玉
侍母朝夕左右未嘗怠母性嚴怒時或擊張面亦
笑承之不少忤也論者以執玉卽無奇行然出市
井中能知孝於所生若此亦可以勵當時矣

丁金阜城武學生父老患目疾金侍湯藥七年不少
怠旣而母病甚焚香告天請以身代金無兄弟惟
一姊嫁而貧金爲買田宅以贍給焉

王豐寧吳橋諸生以孝聞母死哀毀備至廬於墓左
者三載鄉里舉其行時乾隆戊午歲少司寇嘉禾
錢公方爲督學使者卽補豐寧邑弟子員以旌之
王觀光吳橋諸生其父嘗鬻菜於市觀光幼有至性
年十七每旦起必爲父荷菜入市始就學讀書及
父死哀痛幾喪明母死亦如之居喪三年不入寢
年未五十其妻亡亦不再娶也

單文炳阜城諸生侍母疾勞懇備至後兄弟與繼母
相失皆分居文炳獨不忍去委曲以奉之或負其
父千金文炳請於父焚其券常買獻縣人爲僮僮

河間府志 卷之十二 六
母以夫死子賣將改嫁文炳爲之惻然還其子不責復資而遣之

劉樑交河貢生百日失父髫年知孝事孀母色養並至寒暑弗倦三十年如一日

劉廷弼阜城人孝行聞于時妻徐氏以節孝著世共稱之

宋賓王寧津人幼時孝於所生及長父歿盡禮盡哀事母倍極色養母性嚴稍弗懌輒加杖撻賓王笑承之亦時作小兒啼以娛其親乾隆十六年題奉敕旌建坊入祠妻尚氏年登百歲亦於是年循例建貞

壽坊

蘇疇字靜雲交河拔貢生性孝友母白氏晚年患腿疾疇爲製一板輿往來戚族中躬推挽之歷二十
年不倦兄弟與析居以薄田陋室自安中年絕意仕進構養心齋聚族黨講學其中多所成就兩舉鄉飲賓季子燕王子舉人授懷安縣教諭

論曰孝之難言也爲道大矣必言其至非大賢無能盡之觀夫孔子之語游夏孟子之論曾元不可見哉且孟子稱有世所爲不孝卽有世俗之所爲孝世俗所爲孝者割股廬墓祈身代死

之屬是矣予讀風俗通陳仲舉爲汝南太守聞有廬墓二十年者仲舉敬訝躬自詣之見有五子問焉皆倚廬所生仲舉大怒曰汝稱廬墓而淫誕多育穢瀆凶墟以褻先靈因悉取殺之明洪武初青州有江伯兒者母病禱於天若愈當殺子以祀旣而果愈遂以子享焉事聞太祖惡其賊恩斥而罪之於是下令凡民割股者聽其自爲不使得旌此與仲舉所爲其立教牖民之意遠矣且庸行期於本誠大順非資越禮閭巷之人未達此旨或一時激發貪冒榮名隨其所爲往往有之故宋蘇軾謂上求孝則勇者割股怯者廬墓以名相徇此弊所必至也雖然曾參伯奇之行後世旣不可得見苟能念彼劬勞人思自致卽一行一節有可稱道寧非君子長者樂得而與之者乎緡檢舊志見所記載割股廬墓者多有仍復存之而續書其後是雖於孝未或能盡以獎人倫勵頽俗或不乏少助云

忠節

三國

牽招字子從河間人也年十餘詣同縣樂隱受學隱
後爲車騎將軍何苗長史招隨至京師卒業值京
師亂苗隱並見害招與隱門人史路等觸蹈鋒刃
共殞殮隱送喪還鄉於路遇寇他人皆散走賊欲
砍招招涕泣請免賊義之釋去由此知名

北魏

高諒河間人孝文時與隴西李仲尚等共被選爲僚
佐正光中爲徐州行臺至彭城值元法僧反脅降

不從遂遇害諡曰忠

舊志訛高為京諒而通志仍之是未考之於史而古人之姓受改於後矣

唐

李安靜綱之孫也中宗嗣位九年武則天將革命王公百官皆上表勸進安靜時為右將軍獨正色拒之遂下獄來俊臣誣為反安靜曰我唐家老臣欲殺即殺何反之間乎俊臣竟殺之

宋

牟大壯河間鎮人雄毅有膽決勇力絕人初宋之割河間三鎮與金也河間人不從大壯帥子弟共守及河間既為金取大壯以所統眾千餘入山東界築砦自固金後立劉豫為帝大壯乃益招兵傳檄討豫引兵至阜城欲滅豫家遣使奉表於宋願効死殺賊豫與金人共擊之戰敗大壯自刎又太學生聶湖豫鄉人也上書勸豫歸宋辭甚切豫取而殺之

舊志通志皆無大壯見河朔忠義錄

金

烏古論榮祖本女直人久居河間遂為河間人明昌

二年進士官寧海州刺史貞祐二年元兵至城破
榮祖力戰死之贈安武節度使諡毅勇

元

鄭義河間人初起軍伍事元太宗佩金虎符山東路
都元帥兼景州軍民長官從伐金與金人戰於歸
德死之弟德溫從攻徐州亦陷陣而死

明

劉鳳翔景州人萬歷乙卯舉人知河南修武縣崇禎
五年九月山西賊陷修武鳳翔死之初鳳翔將之
官於家祀先人有蛇繞筵上不去家人咸怪鳳翔

曰勿怪吾知之矣問之不肯言至是狗焉鳳翔惟
一子方九歲以在家免難他書所紀或以爲鳳翔
非也

沈全者故城諸生明宣宗親征漢庶人引兵過故城
官吏皆走避全獨詣御營奉果以獻召見談方畧
稱旨命入太學未數月授給事中累官至戶部侍
郎全常劾中官十餘人奸賄爲其黨所中死獄中
全之死於奸黨與死於賊等縣志云高帝統兵
過此高帝未嘗至北地也志誤

白九有河間諸生崇禎戊寅 大兵攻河間或勸之

避九有曰見危授命吾事也不屈死之白亂祚者亦諸生九有宗人也崇禎壬午河間城破兵入肆掠亂祚與其弟諸生亂昌亂賢等閉門拒守兵不得入乃縱火焚之皆燔死

賈太初河間人崇禎丁丑進士早孤其母以節聞而太初事親特孝初知陝西富平縣調襄陽令以母喪歸歲壬午大兵攻圍河間時河間知府顏紹亂率衆守城以拒我師而太初與城中縉紳諸生皆出死力助紹亂守頃之城破諸守者並不屈死太初與其兄弟諸生宏初侗初俱死焉太初死時

年始三十一有子雒英方九歲被掠以去後棄之野間爲人所得太初有同年進士知之乃送雒英還河間後中順治丁酉鄉科官刑部郎中

太初河間人而明史於言孔嘉傳末附書順德城破河間襄陽知縣賈太初山東副使申爲憲皆死則明史之誤又有傳太初忠節逸事者謂其禦敵縋城而死則不知其情事何等莫之能詳也

王崇德景州人世爲儒崇禎壬午景州之破也崇德義不辱衣冠拜先人縱火與其妻共焚諸生吳之

龍與崇德同鄉里至是亦不屈死於兵而諸生趙基王氏純王民皞太學生王應禎王應祥壯士王永圖皆同日死

朱璣肅寧諸生也負氣有勇崇禎壬午寇大至屠掠甚慘璣先部鄉人爲捍守計至是益憤奮與寇搏戰力竭大罵而死寇去數日某家求屍得之面若生

侯振東者肅寧縣卒也具膽勇急於公義有過人者明季流賊大攻肅寧肅寧令安懋修部分城中人及吏卒分陴固守振東守陴東北隅見賊首坐帳中指揮急攻振東請於令曰如殺其渠賊當自退宜舉礮飛擊之令以爲然使振東發礮礮忽反出振東股大傷裂裳裹之復舉礮中賊渠碎首餘衆立解散肅寧獲全振東功爲多竟以股創甚賊去兩日而振東死將死語其人曰礮初激時吾骨已折所爲忍死不仆而必強再舉者欲誓殺賊以全吾城故也

田夢桂肅寧人中明崇禎己卯武舉守備故關忼慨多畧明末亂甚夢桂知不可爲乃歸鄉里國初時盜賊尚衆所在焚劫夢桂多粟居宅宏廣垣壁

甚固可資捍守乃出與鄉里約曰若聞賊來皆就我保聚毋散奔奔則多失或反爲賊擒衆喜諾於是賊至婦孺並入其宅而壯者以械乘墉夢桂時出粟食避賊者因與賊拒賊獨不能勝夢桂其依以全活者至萬餘人後有他賊將攻肅寧肅寧令聞夢桂名請入城與守夢桂固謝已老且身爲廢校捨固關不能守敢云爾乎令強之乃爲條守禦計城亦卒完或有勸復仕者夢桂竟不出年九十餘以壽終

劉允中阜城貢士歷官知葭州告歸已八十矣 大

兵以崇禎壬午至阜城城中拒守允中亦與焉曰雖且老死猶當報國也城破允中殉時與同難者段有成倪子畿杜益盛丁會彬皆邑諸生而其子諸生夢獬亦與允中俱死骨無收焉

段有成當城破時被執迫之降不可威以刃復舉火燎之火烈有成聲益厲至死無少屈

倪子畿之被執也問之應曰吾但求死不知其他主兵者怒甚以刀砍其頸遂死子畿之死也頸血獨上湧見者異之

丁會彬死時年且七十主兵者見其老問之曰若家

貧耶亦富耶意欲會彬出金自贖會彬正色曰此何足問顧我皇朝秀才義無辱理主兵者怒殺之杜益盛知兵法崇禎戊寅助縣令守城城獲全壬午復如之會城中火衆亂不能守城遂破益盛死之張芳阜城賣餅家也壬午之役芳守城東陴及城破外兵入芳大呼城中毋降揮長刀巷戰殺數十人中刃而死呼尚不絕而是時其死可紀者又有張自富

竇豸者吳橋人眇一目猿臂善射方明末盜賊蠭起明將遊擊梁某追賊於縣之于家集方爲賊所困豸聞之帥鄉里二十人往援賊退因言於有司稱其材勇使練鄉里資捍禦豸乃集衆教以擊刺賊來犯其地豸與戰設伏擒賊賊頗憚之適秋時種麥豸所統皆散在田壟忽告賊攻北材豸倉卒引數人往賊衆大至豸與鬪不敵敗還賊追之急或勸入廢墻可且避以待救豸不肯短兵捍賊賊還射豸豸遂死其兄麟復集鄉兵殺賊爲豸報讐時吳橋人又有范從善楊文德孫承基並能鳩衆以保鄉里然勇毅激發未有及豸者

國朝

劉澤厚吳橋人年十五隨其母往河南外翁官所值流賊至澤厚負母以避獲免於難順治十六年成進士知四川安江縣時蜀中初定餘盜尚多來攻縣澤厚迎敵死之康熙五年贈按察司僉事廕其子一人入太學

曲良貴獻縣人順治初以貢生知興安州大同總兵姜瓖反州陷良貴死之廕其子爲太學生

劉正任邱人順治元年拔貢生任知代州已將去官值姜瓖反引兵攻代劉遷者故總兵也陰與瓖通爲內應時變起倉卒正曰吾雖當去然州無正官

乏主守者城破必矣乃號於衆使悉從守城衆皆聽正約束分陴守瓖攻甚急城幾陷正顧其子曰如賊入吾必死之其子鑣年始十二請冒圍出求外援正乃作書納鑣草履中夜縋下之賊以幼不疑意其逃亡者縱之去鑣得至總鎮軍門所卒以救來圍乃解方圍迫時正在城上不暇食者數日論功晉同知太原府

或曰正未嘗死而載之忠節何也夫論人者以其心不以其跡正之心則與城爲存亡者救至而免特其幸耳不然奚不死哉且古史傳忠義

者不在死不死必待死而云然是世俗之論安足取哉

吏師

元

劉濟肅寧人以江東場管勾累調婺州路司獄斷訟
明決不避權貴屢折疑獄所活及所縱遣者不可
勝計延祐初以平反庶獄超陞江浙行中書省左
右司都事卒

夏大亨河間人至元間宰亳州譙縣平反冤獄長史
劉傑嘉其行誼爲立碑於福寧鎮

劉沂河間人至元間宰襄垣縣涖政不猛撫字有方
兼尚文學人以文章政事兩全目之

王居仁河間人延祐中尹涉縣城東北隅歲爲山水
圯壞民不寧居居仁設法築堤患乃息去任民不
忍釋刻石頌德

明

路雲寧津人嘉靖五年貢士資性狷介嗜學勤教諸
生出其門者甚衆初授長洲縣丞廉正自持職務
修舉累膺獎勵卒於官貧不能殮吳人推居官清
慎者以雲爲第一云

尚堂寧津人正德丁卯科舉人歷任太原彰德府推
官陞蘇州府通判蘇爲東南大郡賦稅甲天下堂
始至訪民利弊而興除之政聲大著上官將薦之
未及而卒

苑秀肅寧人弘治己未進士知河南盧氏縣愛民興
學勸農卹災爲時良吏擢刑部主事治獄平允秀
同縣馬冕易瓚皆舉進士冕任臨淄令有清名瓚
爲揚州知府值歲荒設法賑之多所全活冕終吏
部主事瓚位至巡撫河南副都御史

邊永任邱人正統壬戌進士授行人出使安南占城
以節自持不受賂遺安南爲築却金館及典藩祀
總糧儲所在有績以郎中致仕

于大節任邳人天順甲申進士授行人擢御史巡薊州出按大同萬全衛人艱於汲大節鑿井得泉至今名爲御史井再巡湖廣爲地震上八事忤中貴左遷鶴慶府推官聞報輒行賦詩云武昌城裏得文憑小小扁舟載我行莫訝滇池荒服外版圖猶自屬皇明後陞浙江按察使致仕

房瑄任邳人弘治庚戌進士授刑部主事時給事中胡易疏叅中貴崑利上怒下獄瑄抗疏申救兼劾太監韋泰尚書白昂比黨亂政時論偉之累陞河南按察使太僕寺卿

史載德任邳人以進士授聞喜知縣廉明著聲民建祠祀之行取河南道御史按遼督軍民修葺城堡土人難之未幾卽有大警人乃服其先見陞知萊州府累遷陝西副使山東叅政

王重賢東光人正德辛巳進士知卽墨縣徵入爲浙江道監察御史直諫章數十上杖闕下謫判壽州稍轉嘉定知縣入爲戶部主事復謫雲南安寧州同知轉知徐州陞濟南同知終江西按察司僉事剛毅鯁介所至有惠政在卽墨以漁課銀買牛五百以給復業之民在徐却獻金二千以代州民夫

價之半其政務節省與民休息故去後常見思
敖文瑞吳橋人弘治戊午科舉人仕至銅山府知府
歸來家無中人之產每躬親農事朴素如寒儒邑
令題其堂曰二十四年清白吏百千萬世孝廉名
祀鄉賢

李尚綱吳橋人幼聰穎過人早失母外祖張都憲撫
養之張公家積書甚富得肆力涉獵人稱爲經笥
事繼母孝聞性好獎誘後進門下彬彬多賢士以
歲貢授陝西知縣明斷慈惠俗尚巫殘形破產以
事淫祠力禁之少止縣舊苦山水漲瀾傷禾爲築
堤疏渠民賴以饒

李懿吳橋人幼聰慧始能言卽道前世事十歲能文
弱冠舉於鄉性至孝值母病夜焚香告天果愈嘉
靖甲辰科進士初授秦州牧補同州釐弊除奸興
廢舉墜三年轉南民部員外郎歷郎中蒞事甫歲
餘擢陝西漢中府知府漢中政務素冗剖決如流
案牘肅清當道嘆異陞陝西西寧道兵備副使致
仕閉門卻掃以詩文自娛

張玉吳橋人成化丙戌進士任監察御史正色立朝
權貴斂手巡按關陝進廉去貪風裁整肅歷任遼

東巡撫致仕敕諭祭葬祀鄉賢

馬偉故城人永樂癸卯舉人中錫之父也任山西絳州訓導累官浙江處州知府所至皆以賢稱常爲杭州府貳決海寧疑獄弭富陽虎患濬西湖而民利以興及官處州鑛盜竊發單車撫定之偉耿介古直不能與時步趨卒祀鄉賢

于連躍肅寧人幼孤事母孝萬歷癸卯舉於鄉授蒲邑令廉明慈惠士民感其德建生祠祀之晉沂州牧歲餘以均田忤要人調牧平度州復以廉直不徇囑託忤當事解印綬歸嘗述知足知止語以自箴優游林下十有八載敦宗睦婣振貧濟急蓋厚德長者也

李希白景州人萬歷癸卯登賢書初授河南偃師令調嵩縣陞山西永寧牧歷任三邑皆有惠政任嵩縣時有麥瑞兩岐嘉禾三穗之應

國朝

李廷徵景州人禮部郎孔嘉子也以拔貢歷官常州守無錫南北二郊舊有支河爲田家往來之路時議以商或私渡設官權焉廷徵曰此地滄桑靡常乃因商病民耶立革之承恩寺僧雛幸於大府強

姦某衣工女不從殺之屬廷徵訊大府多方爲解同官怵於勢將緩其獄廷徵嚴訊得實卒寘之法關使某部曹舊交也將干以私飾美姬遺之廷徵遜謝曰某年五十餘幸老婦在家有五子數孫今無端受此不特爲官方玷恐無以對子孫其人慙而去在官不携家室布帳敝衣澹如也

王階景州人順治乙未進士初授台州司李有蠹民父子濟惡詞得其狀擒治之悍將挾勢以賂請階麾其金卽杖殺之海上妖氛狎至郡邑多陷官軍抵天台險不可進階曰兵法虛實而已盍先馳檄

以虛聲恫之旣而縱火赭其山沃以水加之斧鑿軍遂徑行乃益請造疑城三十六所以遏賊鋒又創屋數百間居流民內徙者是秋暴雨海漲寇又至階率先登陴會颶風大作發石拔樹因部勒將士順風燒賊艖幢賊大潰獲大砲器械無算久之量移鞏昌丞分防涼州涼絕徼番彝環伺士馬饑羸階申言積糧之算以免貽悞兵食軍府上其事遂爲例擢廬州守再移湖州攝杭嘉湖道先是台之太平縣上浦里虎爲民害階具牲醴牒於上浦之神虎果匿守廬江夏大旱禱於包孝肅祠俄而

雨降祝蝗蝗自投巢湖及是守湖卞山有蠶妖數
敗稼階復檄之蠶自死

戈時雍景州人以拔貢授福安令陞嚴州同知歷官
揚州府知府海寇鄭成功犯京口衆洶懼議奉守
以降時雍弗應第呼子珣曰趣歸善事祖母吾與
城俱碎也時家人方科在側露刃外向髮盡張譁
乃定乃部署守禦出奇挫其遊兵寇引而南亂定
後揚人告變者曰干紙時雍曰是尚可窮詰耶悉
火之以母憂歸竟不起

張冕肅寧人明少保泰七世孫性誠慤順治戊子拔
貢除廣西柳城令時柳尚阻兵署篆武宣防禦安
集訪核所在軍營難婦二百八十餘人各還其家
尋至柳城經兵燹後無解舍官民居城中者僅十
餘家乃焚荆棘驅虎狼掩骼埋胔嚴戢悍兵督民
墾荒田興學校安集流亡男婦五百餘口使之邑
居更單騎入獐賊峒巢諭還虜畧士民妻子柳城
大治

田衷孚肅寧人康熙庚辰進士授陝西興平令廉明
幹濟績報最縣舊有流泉塞百餘年歲壬辰關中
大旱村人求泉脉不獲衷孚躬至其所焚香默禱

更審視其地形指一處命村人試掘之果得泉汨汨然出計可灌田二三百頃遂名永濟泉又詣城西馬嵬神祠步禱雨六十餘里行烈日中甫旋雷雨繼作境內霑足

馬廷贊東光人性至孝順治己丑進士任湖廣宜都縣時楚地初開居民寥寥捐俸金給牛種躬勸農桑闢地五百餘頃宜都地逼賊氛乃練鄉勇勦撫並施賊不敢渡江北下僅二載以勞瘁成疾卒於官其喪之歸也行李蕭然唯圖書數帙而已

秘丕笈故城人康熙癸丑科進士授內閣中書舍人遷主客司轉都水郎中以敏練稱權蕪湖時吏有額外索商一錢者必加重懲宿弊頓革人有秘青天之謠已而視學秦中誓絕請託苞苴不行文卷必親閱以勤勞卒於官

賈維英明殉難知縣太初子也九歲爲兵所掠復得自歸其母沈氏撫教之人謂賈氏故宦族雖嫠無苦然方城陷時太初家已破辛閔不可言狀維英承母訓旣長以順治丁酉舉於鄉旋授四川筠連令筠連當兵火後邑里蕭條維英至卽具牛種募民耕墾招集流亡戶版漸充俄改令廣東之新會

芟除巨盜百姓以安在新會數年治有善績擢知山西岢嵐州以七月隕霜殺穀適西陲軍興上官不欲以災告雜英力請乃得賑遇有爲怨家所誣者罪幾不測雜英爲雪之遷戶部員外郎復遷刑部郎中以老乞歸其歸也以少孤苦舅氏於己有恩爲買腴田百畝以報之

蘇璵號蒼玉交河人父兆公戊子拔貢慷慨好義爲當時所推璵成康熙甲戌進士爲江南休寧令地廣事繁璵下車輕刑減役歲省民費數千民俗買婢有過時無配者悉諭遣嫁甫九月以母憂去士

民懷之服除補寧國縣舊額三項並徵璵易爲三時緩徵用甦民困凡決斷詞訟能以至誠體察民案無留牘鄰縣有疑獄移讞者莫不得其情故所至稱神明焉旋擢吏部出守貴州省思南府卒於任

蘇曙知府璵子也以康熙辛卯舉人知廣西北流縣前令積牘多至三百餘曙至旦夕披勘踰月悉完賊李梅聚黨峒穴間時朝廷知梅久密責粵東西大吏購捕甚急曙承上官檄獲得之造講舍於縣中教士讀書買田四百畝以贍之又免北流關權

無名稅萬七千金商旅稱便縣有圭江歲苦漂漲
曙使人平其灘石且築江岸自是水患遂息未幾
卒於官曙子鶴成乾隆三年登進士

劉儼按察副使三章孫也三章自有傳儼康熙中爲
蕭山令邑有大猾儼除翦之奸惡斂跡然儼而不
苛吏民畏愛時稱良吏第一遷山西吉州牧時地
震之後歲荒民流儼到官招集逋亡出財爲民代
輸逋課三千餘金旋以憂去後補廣西永安州調
知左州州與交趾界人多獷悍儼立學校以教之
有登鄉薦者州人多事巫鬼以術惑衆雖刑法不

能禁有牟生者爲之魁儼破其奸由是改爲善上
官累表其治狀擢兵部選郎轉工部郎中出知寧
波府致仕

張震孫字雲門河間人以康熙庚午舉人任饒州府
浮梁令治內有景德鎮者產磁器江寧回民以商
販至其地輒用迷藥掠去子女鬻於遠方居民咸
切齒訟於官久而莫能白震孫密訪得之盡數捕
逮回黨還欲奪其衆居民以宿忿故擊斃百人震
孫雖坐是罷官而掠賣之弊遂息

季崇楷號怡亭吳橋人以孝廉授安徽霍山令霍邑

土瘠民貧向有賠糧三百餘兩攤於衆姓崇楷慨然出養廉代補而急爲援請豁免蒞任三載民漸殷富乃創建書院聚生徒講授其中士風大振後以憂去官補廣西陽朔縣凡所設施一如治霍山俾穉穉咸知禮法調繁陵雲地多不毛爲招集流民數千家墾地二萬餘畝瘴鄉多厲札崇楷素知醫調治藥餌以療民病無不應手愈旬歲民皆樂業又爲之延師築舍教以詩書請定廩增附額以獎厲之秩滿陞湖北安陸府同知到任未半載因伏汛漲天門潛江隄潰崇楷冒暑督修三月訖工而以暍病卒方崇楷之初任霍山也前令鮑擅發帑賑饑虧項且獲重罪崇楷力靖於制府任之無難色子炬乾隆壬申舉人

侯國正字克生吳橋人成庚戌進士試用山東知州是時東省以水告災汶上尤甚急需才與德俱者司賑務國正至乃檄之往國正虛衷確查親爲散給不使吏役稍有侵漁災黎咸獲實惠慶更生焉其有貧病不堪者間出私囊周恤之以勞勩成疾事未及竣而卒

文學

晉

木華字元虛廣川人爲楊駿府主簿有清才文辭宏
逸世傳海賦一篇華所作也至齊時吳人張融亦
爲海賦欲以抗元虛其敘以謂木生之作君自君
矣然論者云昭明太子撰文選捨融而取華亦以
華篇高於融製也

北魏

李叔虎修人也好學博聞爲鄉里所稱太和中拜中
書博士卒諡曰穆子述亦有學識舉秀才太常博

士

封懿修人雋偉有才能屬文仕北魏爲黃門侍郎常
撫慕容氏事跡成燕書人以爲與車頻秦書劉曷
西涼錄並足備於霸史

黎廣鄭人也善左氏學太武時官尚書郎

邢蚪鄭人也少爲三禮鄭氏學明經有文思舉秀才
上第爲中書議郎孝文問朝廷宴享據經以對稱
旨及上崩尚書令王肅多用新儀蚪往往折以五
經正禮歷尚書左丞卒

北齊

馬敬德河間人少好儒術從徐遵明學詩禮別通春
秋左氏教授燕趙間生徒甚衆

張思伯樂城人善說左氏爲馬敬德之次撰左傳刊
例十卷亦爲毛詩章句以二經教授爲國子博士
與思伯齊名者又有長樂張奉禮焉

隋

劉善經河間人博物洽聞尤工詞章官著作郎著訓
德傳諸劉譜四聲指歸凡數十篇

趙揆本居河間世爲大儒尤淵雅博物隋時與同郡
劉焯俱徵

唐

彭景直河間人景龍中爲太常博士時獻昭乾三陵
皆日祭景直上言於禮陵不日祭乃止

苗神客東光人爲周王府戶曹參軍與元萬頃等同
司著作時號北門學士

尹元凱樂壽人爲磁州參軍免歸棲遲三十年詔授
右補闕時文章之體爭尚徐庾共爲流蕩元凱與
武功富嘉謀新安吳少微獨原本經術雅健爲宗
士皆稱慕之

高重儉五世孫也明經中第爲國子祭酒文宗好左
氏春秋命分列國各爲書成四十篇與鄭覃等刊
定九經出爲鄂岳觀察使有美政拜太子賓客卒
贈太子少保

劉長卿字文房河間人開元進士至德中爲監察御
史以檢校祠部員外郎爲轉運使判官赴淮西岳
鄂轉運留後吳仲孺誣奏其罪貶南巴令有爲辨
之者除陸州司馬終隨州刺史有集十卷行於世
或曰長卿本名文房後以字行故人但稱長卿長
卿爲人性剛每易忤物故殷璠謂員外剛而犯上
兩遭遷謫皆自取之早與張九齡杜甫王維相接

河間府志 卷之十二 四
及唐中興後而長卿爲詩人之冠與錢起齊稱世
謂之錢劉又謂長卿爲五言長城時人語云未有
劉長卿一句已呼宋玉作老兵矣其名重如此長
卿於文亦工其在淮西常奉使過睢陽時城已陷
張巡許遠皆死長卿爲文弔之其詞悽壯傳於當
世謂過鮑照蕪城賦云其見稱者又有畫龍記

五代

王延鄭州人少好學常以所作賦謁梁相李琪琪爲
之稱譽馮道作相與延故人召拜左補闕遷水部
郎知制詔拜中書舍人知貢舉時盧尚書紀與故
相崔協有隙協子頎方應舉紀隱以其意示延欲
令不取頎延退而笑曰恨其父乃及其子乎竟選
頎中第人服其公延爲人重然諾與弟相友愛五
代之際稱其家法焉

宋

張昭河間人十歲能誦詩數十萬言長通經史太祖
時爲吏部尚書嶺南平遣使就昭問獻俘禮昭方
卧疾口占以對並有証據人服其該洽

邢昺鄭人童子時已能誦書數十卷長益博習爲宿
儒所推應九經舉至京師士聞其名爭來訪叩戶

外常滿廷試日召至外殿使講易師比二卦義甚
通朗又取羣經發問曷並疏對稱旨太宗嘉之擢
上第真宗時授翰林學士遷刑部尚書及卒上以
宮邸舊僚親臨其喪爲之流涕初諸經皆有疏唯
爾雅尚缺乃敕曷爲之曷所著又有孝經論語等
說凡十餘萬言

邢居實邢恕子也字惇夫年甚少有逸才常賦明妃
曲云安得壯士霍嫖姚縛取呼韓作編戶晁無咎
見之大驚又作南征賦秋風三疊爲蘇黃諸公所
稱賞因皆與之遊惇夫早卒恕哭之甚痛黃魯直
挽以句云眼看玉樹埋黃土何況人間父子情蓋
深惜之也

任邱志誤以居實爲居室亦不言爲恕子且以
義士稱之因明妃曲語云云謂其志切忠勇則
全未知居實爲何人也又舊志人物載邢恕恕
雖從河南程氏學然爲人傾險在元祐時黨附
蔡確賣友負國欲上誣宣仁變亂黑白是其生
平可知恕常欲從邵康節學數術康節不肯教
恕曰恕之聰明足以學此然恐知數術正足以
濟其奸也

遼

劉景河間人好學能文為翰林學士遼景宗知忠實
可用乃書其笏曰劉景可為宰相景死子慎行又
為遼北府宰相數有陳諫遼主重之

金

程思溫瀛州人與其從弟思忠皆有文元好問常稱
為皆天民之秀有用於世者遂薦之於耶律丞相
麻九疇鄭州人幼有神童之目金章宗召見問九疇
入宮殿中懼乎對曰君臣亦猶父子子寧懼父耶
上大奇之長以學自力尤長於易春秋後以第二

甲第一名及第官翰林應奉文字自度不能諧世
謝病免歸其詩工於賦物與元裕之尤相知卒年
五十

元

李京河間人為烏撒烏蒙宣慰副使所著有雲南志
鳩巢漫稿

劉遵河間人有異才為詩多不經人道語學士元明
善見而奇之中丞張養浩亦為延譽未官而卒

明

樊深大同中衛籍河間人深好學有雅才中嘉靖壬

淮州府志 卷之十二
辰進士自戶科給事歷官刑部侍郎時河間守部相以郡無志乘慨然欲修之舉以屬深深成書二十八卷郡之有志自此始也今深書不傳明史藝文志列其目

袁淮任邱人正德丁丑進士初官知縣累由戶部郎中知淮安府以苑馬少卿致仕淮少有俊才工吟咏其詩宛轉清麗狀修長玉立美髭每有所作必刻意出之有汾泗淮及西征諸集

國朝

龐塏任邱人康熙乙卯舉人會戊午歲有詞科之舉

刑部主事李模中書舍人張星耀薦塏得與試中選授翰林院檢討後改官中書舍人歷工部主事戶部郎中出知福建建寧府未幾罷歸所著有叢碧山房集

多時珍阜城人江西布政使弘安子也康熙丁卯舉人官中書常與修政治訓典喜爲詩居家以長厚稱

河間府新志卷之十三

人物志

高行

三國

沐並字德信河間人少孤貧特有志操不畏強禦性
尤廉峻時有軍人役作者一人先作飯熟呼未作
者食其人不肯食呼者笑曰汝欲爲沐德信耶其
名爲隸卒所知如此

隋

尹式河間人博學能文少有令名仁壽中爲漢王記

室王甚重之常諫王不聽及漢王敗式自殺以從

唐

李懷讓修縣人神龍中為御史時崔湜鄭愔為吏部附貴倖選注不公懷讓顯劾其罪於是湜等皆斥去

宋

義式者與劉豫同鄉里幼常共學心鄙豫勿相善也式後為微官而豫已貴每招式輒不往及金取宋河北立豫為齊帝式聞之痛哭欲以其家歸宋而豫先遣人守之不得發又使逼式仕曰若不從威

之以死使至挺刃示式式引頸曰持我頭去可也

豫亦竟捨之式戒子孫終金世勿仕

元

張之賢河間人躬耕養親樵採以供甘旨間從師授書通其大義父疾思生鯉以居在平陸莫能致夜冒寒走二百里得之以歸縣以其孝欲署為吏不就後以薦入官持心平恕遇事剖決悉當廉慎自將嘗提舉山東諸路所過無侵擾民皆感悅未幾移疾退閒以約濟勤家漸饒裕歲饑僅有所賑施全活甚眾延祐七年卒

滄溥河間人常事哈撒丞相丞相得罪門下皆散去
獨溥收葬其屍又上疏爲之訟寃得復封爵貢尚
書師泰義其所爲特爲賦詩溥後官至四品

明

王昇任邱人聘申氏未婚而女病瞽女之父將以聘
物還王氏恐其不欲娶也昇父敬知之以問昇昇
曰女不瞽而聘聘而後盲此其命也如返聘女將
安歸竟娶之

張才肅寧人正統六年邑大饑才出其粟一千二百
石以賑餓者有司奏之詔旌爲義民與才同時吳
橋趙剛東光郭有諒故城劉敬寧津耿思恭出粟
賑荒者與才多少畧等並以義旌而賜之羊酒至
弘治中交河復有揚熒者出粟濟貧民凡十歲歲
粟三百石云

廖瑄本海南人後隨父北徙家東光遂爲東光人十
六爲諸生東光人多從受學瑄性仁惠景泰中東
光饑疫死者枕野瑄率僮僕斂其骨而埋之里人
或不能殮爲之買棺不責其償有男子夜被酒僵
卧雪中瑄見之掖歸家家人懼以死爲累瑄曰吾
知活人耳他非所計也

侯壽布衣士也其先利津人徙居河間遂爲河間人好學尚義不求仕進正德中劉瑾亂政毒螫士林壽心不平之因詣闕上書陳守成十事凡八千餘言武宗大怒下之詔獄壽安然不爲動賴當事皆憐其忠直力爲營救居犴狴中三月始得釋壽於歸日惟慰藉其母而已有祖進士者心敬其人柱道河間訪之錄其諫疏以去壽常有疾夢劉守貞遣人視之一夕頓愈夜行遇盜盜視壽駭曰此侯君也相率拜伏嘉靖辛丑歲凶人疫壽悉力活其戚友甚衆又好化誨里中子弟之浮薄者三子並

有文其長九圍舉於鄉官遼州知州

壽之行誼如此有古丈夫風其上書直言亦當與漢朱游唐蘇安恒比乃王奐志則并其姓名無之豈所謂闡幽彰烈者哉

耿思恭寧津人敦樸力田積粟起家正統四年歲歉思恭推濟貧民全活百餘家時朝廷遣侍郎魏驥出視蝗旱驥清德素著聞思恭所爲心甚重之明年復荒思恭慨然出粟千四百斛助官賑卹有司奉聞詔表其門曰尚義賜敕獎諭勞以羊酒復其家三年

邊國柱任邱人以貢爲安陽訓導擢崇信令遷寧州知州性甘淡薄有因訟求勝餉以美珠者謝不受如法治之居官旣廉潔或以子孫遺產爲言答曰古人有說矣子孫賢何須錢爲子孫不賢復何須錢爲及謝歸若爲書生時杜戶不預他人事鄉里咸敬之

劉鳶交河人以貢爲訓導不仕性好學老而不輟妻死無子孑然獨居貧尤甚躬事炊釜安之無愠年且九十而耳目聰明行步加健遇鄉里後生唯以讀書爲善告之語笑自適若未常貧者郡守令聞而嗟嘆時遺錢粟其卒也里人曰長者歿矣可無葬乎爲殮而封於野

田鸞寧津人正德六年劉六劉七盜起引衆攻寧津寧津令櫻城守勢且不敵鸞爲計畫之賊遂去而城免於陷事定令宴鸞於學宮具五十金爲鸞壽且將聞之於上鸞却金固辭退耕於野終其身

郭聰寧津貢士也動必循理人以郭循理呼焉爲葭州學正諸生劉儀死貧甚聰買棺葬之又出俸錢助諸生之不能娶妻者凡數人遷成山衛教授卒劉珂吳橋人嘉靖二十年珂出行村里見有人坐樹

下已而竟去遺物於地不覺也視之爲金二百珂
知其必返尋乃亦坐樹下待之時腹且饑採桑椹
食之卒不動比暮一人皇遽至狀若欲泣珂問爲
誰曰吾某所解糧戶李全義也早於此少息官銀
二百遺不復見罪當如何矣珂謂全義無恐吾爲
子守之待且久因出金還全義其人欲謝之珂笑
曰吾不携之去顧須謝乎故城盧深者少時拾遺
金三百於衢後又有失金者深再得之並以還其
人與珂行畧同

孟尚質交河人年十六父爲商死淮南尚質聞訃日
夜號泣馳數百里奉柩以歸尚質性敦朴好義所
居瀕河他日有覆舟者尚質呼於岸曰能救一人
者吾予一金於是爭皆赴救活者十餘人賊入其
室諭而遣之後亦改行不復爲偷或記尚質又常
還遺金云

于化龍交河人崇禎甲戌縣當貢生員一人化龍名
已定其同學生謂化龍曰子尚少於我我老矣非
貢入太學終以諸生死耳能相讓乎化龍卽許之
遂讓其人又化龍前時成化中諸生馮讓當膺貢
其次爲劉某讓亦推與之至明年又讓於潘信兩

人謙退不爭並號長者

李晉福者事景州諸生趙遵譜爲僮崇禎中 大兵入塞破畿南郡縣畧地至景州晉福方隨遵譜行野外倉卒被擄去家人未知也去數日晉福潛自兵中還言狀遵譜家皆痛哭旋呼晉福已不知所之意其亡去也後三歲遵譜忽自歸家人且歡且愕以問遵譜皆晉福所爲晉福初以被擄告其家卽去從遵譜出塞外備歷危苦遵譜初見俘時本乘馬馬爲人奪與晉福徒跣行居塞外久之有騎過遵譜前者識爲己馬直前奪之騎者怒拔刀砍

遵譜仆地流血幾死晉福負歸土舍中求藥裹創僅乃獲愈遵譜性蠢負氣不能爲人下晉福戒曰若此且速禍當忍而俟之脫可得歸縱不然猶幸免爲人戮而尚欲如家居態乎兩人在兵中日益習其弁校試問晉福晉福詭言遵譜吾弟也兵中常呼遵譜有所役使晉福輒曰彼小弱不任爲代遵譜役兵中旣多喜晉福者後稍弛其防晉福乘間乃教遵譜亡歸竟得至家遵譜歸一年晉福亦逃入塞見遵譜持而相泣也遵譜於當時無晉福者擄死久矣晉福崎嶇不顧患難死亡以從遵譜

河間府志 卷之十三 七
卒能全而脫之而已亦免焉彼所謂古俠丈夫之風者耶

明淳安徐老僕傳作於田汝成縉紳先生爭稱之景州志不傳晉福吳人趙貴朴書趙遵譜事乃記晉福名要之晉福宜傳而若遵譜者但當附晉福以見者也嗚呼若田氏者庶幾其知史法哉

國朝

竇懋功肅寧拔貢生初聘伏氏女女日後盲父母欲改聘以語功功曰設我不幸瞽焉女當何如父母

感其言乃止後伏氏至功待之甚篤數十年未常少嫌

張開第肅寧人祖老病便溺衣服手自浣濯十年不怠所善李文病篤將死屬以幼子及死卒爲李氏子完其室家常以牛市於人價若干買者誤多與之去開第追還之不有也

張宗稷明末爲肅寧諸生有大賊數百夜至其里從劉姓人索汲水具弗與殺之且將屠居人衆皆惶懼宗稷直往賊所說之曰劉不供汲具已殺之矣他人何罪焉且盡殺之於將軍何益稷願奉百金

具牛酒將軍幸貫之賊乃捨去

朱珍亦肅寧人生明末所在盜起里人相與謀將弄兵以珍秀才劫使爲主不可則殺之旦日遂召珍計事珍先知其意乃佯許舉事而故緩其期陰召鄉中富人告以利害使共出財粟分給諸欲爲亂者衆得暫止未幾國朝定鼎遣兵分捕諸盜賊凡常聚集剽暴者悉討斬之而珍所居里以珍故獨全

賈潤故城諸生其人好施予重然諾常出金數百修廟學又常爲民立義塚以便貧無葬所者康熙甲

子故城大饑民困於輸賦潤以家財代輸者幾千金生平所爲大約多若此

戈惠儒景州人常早起於路拾珠一串俟之有媪跡求者因舉還之

孫洪緒河間衛諸生素長厚女姪幼孤撫之如己子有負枉者不能自白洪緒爲直之人以金來謝却之曰子自枉耳我當爲子雪何謝哉家有園桃方熟往視之見攘桃者適在樹上乃避出俟其去而後入焉謂其妻曰彼貧者或驚墮傷折何面目向人乎

蘇鉞交河太學生家世豐產常能周施善卜筮性至孝治父喪費巨萬闔郡畢至邑令有逋官錢至三千金者鉞代納之俾脫然去山西金勗質女於鉞期滿力不能贖出其券與之仍濟十金使歸武城王乙鬻子而遺其金刎頸幾死鉞以藥療之按所遺遺之及鉞歿有奔赴喪所哭泣盡哀者問之曰鬻子遺金者也先是康熙癸未山左饑流民至縣境數百人鉞餼米分給人三十龠錢百文不挾旬來日益衆旋賣膏田三百畝繼之後邑人以事至東昌人咸就問訊知鉞無恙皆喜而去

賈正符郎中雒英子少有行誼奉生母田氏以孝稱有故人子已鬻於人矣正符知之卽謀於衆爲贖還其家終身無德色

邊元邃任邱人雍正己酉舉人性純篤其弟元明幼瞽與之卧共被晝同食愛養甚至及長復以教授所得資爲聘室焉後元邃卒元明哭甚悲哀久之不忘聞者皆嘆息

何培阜城舉人常之園中有人盜其棗見之輒退出曰使彼墮而傷何以爲人事母能孝兄歿侄長以家付之而已不私素好書爲浙江場使或夜餽之

金不受及還載書滿舟曰吾宦業得此足矣

多宗孔阜城貢生少謹厚兄弟分居言於父母復合
炊撫孤侄若己子有從弟信巫鬼爲魘勝物埋宗
孔屋中已而其少女死家人知而發得之欲訟於
官宗孔曰女死命耳詎彼能爲且訟之則彼得罪
矣後從弟聞之改行焉常買人女爲婢及長召父
母還之使爲良人妻不責其值人多其長者

蘇晔交河人知府璵子世厚於貲晔性好周施以助
濟貧寡爲事族人待舉火者十六七時又以車載
粟餉朋友親戚匱乏者歲費千斛勿計也死無殮
者見寒冷者或予之棺衣行之終其身晔康熙癸
巳舉人以例當選太常博士未除而卒

朱有容肅寧人性孝友母病十餘年躬奉侍不怠母
歿弟幼保愛之寢食必俱尤好施予值歲凶宗族
貧老者多藉以活又常鬻己馬代人還逋鄉中人
以事累牽連數十輩幾及危禍有容爲營救甚力
卒皆得免咸共德之合百金持奉有容爲壽却之
曰吾豈爲利顧見義然耳其生平行事如此後以
子潤貴贈文林郎夏縣知縣

劉子常阜城人好善樂施鄉里翕然稱之

崔福庭阜城人好施予憫窮乏鄉人目爲長者

周日庠字養三號非蓼吳橋人幼時能文章爲諸生試輒冠軍康熙庚午舉於鄉屢困公車乃自居家教授生徒四方來學者日衆或貧乏不自給卽資之膏火俾卒其業爲學務經術不競時趨雖時誦習帖括要以見道爲宗主著有經史辨異諸儒論衡若干卷

王樞號淡園吳橋人生而明敏品端學優爲識者所重赴棘闈不售歸而益精所學百家諸子之書無弗讀栽花蒔竹時以寄興勢利之好淡如也爲人

言笑不苟服飾淳朴濟人之困厚施而不望報卽人非故識驟有所請亦如所求而去邑宰杜公于籓以其行足風世乃修憲乞之禮子燮康熙乙酉舉人事繼母以孝聞三子光爲諸生累舉優行

蘇炘交河人輕財好施與所居留慈村多盜賊炘示以大義周其衣食卒皆爲善嘗有節婦黃氏者自十九歲守節子二人尚幼其兄欲令改適受耿姓財物氏偵知之謀自盡鄰人曰子真節婦耶非白於蘇善人恐不免氏乃匍匐奔愬炘親至其村耿姓迎娶者已在門矣炘勸之去曰娶妻爲無後計

耳黃氏苦節人所共知今將強娶之不祥明日齋
錢如其兄所受數還之黃氏獲終其志

李炯字倬雲吳橋人父早世事祖母及其母色養備
至質穎學優爲諸生試屢第一雍正癸卯拔貢不
樂仕進遂居家教授生徒有貧不給者時佐以薪
火抱腿疾不起仍不輟研究著春秋輯義拾遺草
若干卷平生重交游樂推解稱於郡邑

紀策字君章獻縣人輕財好施嘗以遺產三千金讓
其弟鄉黨義之又置義館於周家村延師課士多
所成就其子暄能繼述父志以孝謹稱於時

隱逸

唐

趙元素河間名儒揆之孫臨穎丞禮輿之子也有英
雄之姿學不常師志在遐遠褐衣游洛爲名流所
宗徵仕不就從容林藪卒陳正字子昂爲碣傳之
號之曰昭夷子

宋

張預東光人隱居不仕善談兵常以古今將帥用兵
成敗無不與孫武書相合因取古良將百人集爲
一書以武之兵法論列其後名曰百將傳上於朝

河間府志 卷之十三
三
曰臣編此書數年而後成雖不足以補陛下教育
武士之道然臣惓惓之誠勤亦至矣書奏詔藏秘
閣中

榮邁阜城人與常秩夷甫並名初皆隱居不求仕進
後夷甫就徵爲御史或譏其抱節不終時有詩曰
不見河南常處士五更騎馬聽朝鷄蓋謔之也惟
邁始末守一文潞公常稱爲得柴桑田園之志者
此人是己性靜朴不與世交故知之者少
諸志皆無邁林下客談載之

金

梁子直獻縣人恬退不仕爲成趣園居之日嘯詠其
中同時名彥學士黨懷英等並爲賦詩

元

胡宗至正時故城人自號東臯子明洪武初邑令錢
本忠聞其高逸至其家訪之稱曰義叟或云元時
故官也至永樂末猶存時少師儀智謫居故城與
交最洽云

明

路智肅寧人爲諸生朱邸欲引爲伴讀耻進不以正
固辭之隱於家年七十餘卒

鄒野漁者東光人弘治中常從征妖賊有功命官與金皆不受退居郊野與邑尚書廖紀善常依於紀一日縣中新第諸進士皆集紀所頗傲野漁紀與野漁共賦漁樵圖詩野漁先成曰上林朽木歸樵斧宦海貪魚上釣竿須信堯夫原有意時人休作畫圖看衆覽之知爲所誚改容謝焉後紀卒野漁無所歸寒餓而死

多嘉禎阜城諸生或薦其有經務之畧崇禎中下詔徵之謝不起及有司迫致京師欲授之官固辭歸鄉里卒

國朝

李近斗河間人天啟丁卯舉人鼎革後不復求仕鄉居食貧自處更其名爲松碩號曰栢友以見志卒以壽終

申鍾霍天啟丁卯舉人知江南英山縣至康熙壬子歲州有公事或請鍾霍署銜名答曰但書天啟丁卯舉人英山縣知縣可也鍾霍初自英山歸卽杜門不出四十餘年

王餘祐本新城人後教授獻縣家焉遂爲獻縣人餘祐少時負氣甚豪從明大學士孫承宗於兵間頗

河間府志 卷之十三
論時世事習擊刺好兵法及承宗死去往來燕趙
間久之盡謝其所常相善意氣相尚者專志於詩
文貧不自救轉徙獻縣以講授爲事諸生多在門
下者餘祐好飲酒自號五公山人有集數卷人爲
刻之康熙中卒

伎術

秦

扁鵲者渤海鄭人也姓秦氏名越人少時爲人舍長
舍客長桑君過扁鵲獨奇之常謹遇之長桑君亦
知扁鵲非常人也出入十餘年乃呼扁鵲私坐間
與語曰我有禁方年老欲傳與公公弗泄扁鵲曰
敬諾乃出其懷中藥子扁鵲飲試以上池之水三
十日當知物矣乃悉取其禁方書盡與扁鵲忽然
不見殆非人也扁鵲以其言飲藥三十日視見垣
一方人以此視病盡見五臟癥結特以診脉爲名

耳爲醫或在齊或在趙在趙者名扁鵲扁鵲過虢
虢太子死扁鵲至虢宮門下問中庶子善方者曰
太子何病中庶子曰太子病血氣不時交錯而不
得泄暴發於外則爲中害精神不能止邪氣蓄積
而不得泄是以陽緩而隱急故暴斃而死扁鵲曰
其死何如時曰鷄鳴至今曰收乎曰未也其死未
能半日也扁鵲因是言臣齊渤海秦越人也家在
於鄭未嘗得望清光侍謁於前也聞太子不幸而
死臣能生之中庶子曰先生得無誕之乎何以言
太子可生也臣聞上古之時醫有俞跗治病不以

湯液醴灑鑿石橋引案抗毒熨一撥見病之應因
五臟之輸乃割皮解肌訣脉結筋擗髓腦湔澆腸
胃漱滌五臟練精易形先生之能若是則太子可
生也不能若是而欲生之曾不可以告咳嬰之兒
扁鵲仰天嘆曰夫子之爲方也若以管窺天越人
之爲方也不待切脉望色聽聲察形言病之所在
聞病之陽論得其陰聞病之陰論得其陽病應見
於大表不出千里決者至衆不可曲止也子以吾
言爲不誠試入診太子當聞其耳鳴而鼻張循其
兩股以至於陰當尚溫也中庶子聞扁鵲言目眩

然而不曠舌橋然而不下乃以扁鵲言入報號君
號君聞大驚出見扁鵲於中闕曰竊聞高義之日
久矣然未嘗得拜謁於前也先生過小國幸而舉
之偏國寡人幸甚有先生則活無先生則棄捐填
溝壑長終而不得反言未卒因噓唏服臆魂精泄
橫流涕長潛忽忽承映悲不能自止容貌變更扁
鵲曰若太子病所謂尸蹙者也夫以陽入陰中動
胃纏緣中經維絡別下於三焦膀胱是以陽脈下
遂陰脈上爭會氣閉而不通陰上而陽內行下內
鼓而不起上外絕而不爲使上有絕陽之絡下有

破陰之紐破陰絕陽之色已廢脈亂故形靜如死
狀太子未死也夫以陽入陰支蘭臟者生以陰入
陽支蘭臟者死凡此數事皆五臟蹙中之時暴作
也良工取之拙者疑殆扁鵲乃使弟子子陽厲鍼
砥石以取外三陽五會問太子蘇乃使子豹爲五
分之熨以八成之齊和煮之以更熨脇下太子起
坐更適陰陽但服湯二旬而復故故天下以扁鵲
爲能生死人扁鵲曰越人非能生死人也此自當
生者越人能使之起耳扁鵲名聞天下過邯鄲聞
貴婦人卽爲帶下醫過雜陽聞周人愛老人卽爲

耳目痺醫來入咸陽聞秦人愛小兒卽爲小兒醫
隨俗爲變秦太醫令李醯自知伎不如扁鵲也使
人刺殺之

漢涿郡渤海皆高帝所置鄭屬涿郡此云渤海
鄭人不知太史公何以言之且北齊徐之才序
八十一難稱扁鵲爲世居於盧意鵲亦未必果
爲渤海人也今聊因史記書之又按說苑扁鵲
診趙太子與史記號太子殊復有軒光之竈八
成之湯子明吹耳陽儀反神語視史遷尤異也

北齊

信都芳北齊河間人少明算術兼有巧思嘗云算法
之妙機巧精微我每一沉思不聞雷霆之聲嘗集
五經算事爲五經宗及古今樂事爲樂書又聚渾
天欵器地動銅鳥刻漏候風諸巧事並圖畫爲器
準又造輪扇二十四埋地穴中以驗節氣每氣至
則輪扇自動其巧妙如此封長城子

隋

盧大翼隋河間人本章仇氏七歲日誦數千言州里
號曰神童及長博綜羣書尤善占候隱林慮山中
受業者自遠而來文帝將避暑仁壽宮大翼固諫

河間府志 卷之十三
帝怒將斬之及疾將崩命太子釋之煬帝卽位賜
姓盧氏其言天文事應驗者不可勝數

張胄立博學多通尤精術數冀州刺史趙獎薦之高
祖徵授雲騎尉直太史叅議歷事時輩多出其下
令楊素與術者數人究歷議六十一事皆舊法久
難通胄立通五十四擢員外散騎侍郎兼太史令
改定新歷與古不同者三事超出獨異者七事胄
立獨得于心論者服其精密大業中卒官

宋

劉翰臨津人世業醫至翰而術更進爲翰林醫官著
經用方書三十卷論候十卷行於世開寶中兩奉
詔同道士馬志討論本草焉

金

劉完素字守真別號通元子河間人少好醫術後遇
老人自言陳希夷授斗酒飲之及醒大有開悟遂
精於術嘗撰運氣要論宣明論素問元機又約內
經病機十九條著原病式而舉二百八十八字以
盡醫之變又爲習醫要論直格書三卷行之金時
三聘不起賜號高尚先生說者以完素要旨論原
病式作而內經之旨昭如日月直格書宣明論作

而長沙之法約如樞機則河間爲有功云

明

張紳字希賢寧津人正統間以世業入爲天文生從
太監某占攻守有奇驗後隨總兵官石亨征延綏
再隨柳溥征甘涼多異績歷擢監副乞休掌監事
章軒言紳善察璣衡命紳教習修改渾儀在任致
仕留以待就問焉

國朝

孫悅之任邨人工醫尤善鍼灸自云夢神授之衆皆
不之信然爲人下鍼灸疾往往得驗有起死者其
同邑翰林龐君塏常苦患癖孫與鍼之下血數斗
其病立已孫性頗傲不理人口龐獨以爲深感於
其死作詩輓之云未免有人欣一死定知惟我感
重生

仙釋

漢

元俗河間人賣藥都市河間王病瘕買服之下蛇十餘頭王問所以曰此乃前世餘殃下墮非王所招也王常放乳鹿乃麟母也仁心所感故宜逢俗得爲治之後忽去不見

三國魏

甘始甘陵人魏黃初間自言能行氣導引老而少容曹子建密問之始曰吾師韓世雄嘗與吾作金於南海投數萬金海中又取雙鯉用藥塗其半置沸

湯中游行浮沉有藥處鱗甲自如無藥處已熟而
堪食矣子建求其術始曰此藥遠在萬里不可卒
得也

北魏

郝姑字女君本太原人後居莫縣魏青龍間與鄰女
十人於漚池水邊挑蔬忽有三青衣童子至女君
前云東海公娶女君爲婦言訖數茵褥於水上行
坐往來有如陸地其青衣童子便在侍側沿流而
下鄰女走告之家人往看莫能得也女君遙語幸
得爲水仙願勿憂怖仍云每至四月送刀魚爲信

至今四月多刀魚鄉人每到四月祈禱州縣長吏
入女君祠先拜然後得入於祠前忽生青白石縱
橫可三尺高二尺餘有舊題云此是女君夫上馬
石尚存焉

唐

俞靈瓚河間人入衡山九真觀學道十餘年南岳赤
君授以回風術行之二十年能坐見世事如在掌
中元和中人有識之者則曰我偶然耳非有他異
也遂絕粒入九疑山不返

元

上官時隱者獻州人初事邱處機爲弟子與王重陽馬丹陽等篤意修道時張紫陽道法行於南方稱南宗邱處機稱北宗北宗王重陽等號爲七真而上官不與焉然處機謂其生具夙根卒傳宗法年九十餘隱入太勞山中至正末有見之者身輕若飛鳥顏色轉少蓋得地仙矣

諸志無上官見仙宗外紀

明

謝瞳葛姬者景州人長齋念佛勸化人一日言於衆曰我欲成佛火煉金身矣遂趺坐有頃鼻口發烟火旋躍而下跌宕屈伸觀者如市須臾衣焚氣絕火乃滅

寓賢

漢

吾邱壽王字子贛趙人也年少以善格五召待詔使
從中大夫董仲舒受春秋高材通明遷爲侍中中
郎汾陰得寶鼎武帝薦見宗廟藏於甘泉宮壽王
獨曰非周鼎時方多盜禁民挾弓弩壽王對以爲
非便不當禁上從之

舊志以壽王爲任邱人謂任邱有壽王讀書臺
俗呼虞邱以聲近而訛夫吾固可讀如虞國語
暇豫之吾吾韋昭注吾音魚魚虞同音然古自

有虞邱姓苑載之漢藝文志有虞邱子儒家一篇則恐不得卽指虞邱爲吾邱之變也繪玉集引壽王賦逸句云家本邯鄲遠仕咸秦則壽王明邯鄲人史所以云趙人者矣通志徒因史說列壽王於趙州是亦強爲之指也若任邱在漢本是鄭縣終屬燕地不應據後世趙北口名直以爲趙也壽王之不爲任邱人斷然者或常遊於此有遺踪焉是未可知今以流寓記之不與毛公同各有取爾矣

蔡邕靈帝末避罪亡命常至河北經河間鄉亭夜宿

有呼邕者入門曰聞子好琴吾有古曲世所未曉者當授於子邕起而再拜其人據牀取琴鼓之音聲淒厲如霰雪之集松栢鷄鳴乃去邕默記其操作清溪五弄

諸志無此見古琴錄按他書謂邕入山中鬼谷子所隱處有清溪乃作五弄說與此殊又舊志通志皆載趙岐考之岐未常寓居於此也故不復錄

唐

趙驊與李華獨孤及齊名小時勤志學業聞瀛州李

氏自隋以來世爲儒門多積書乃往來爲館客因得盡讀焉再歲而歸無不記習者遂以文章著於時

諸志皆無見歷代纂聞

宋

家鉉翁宋末端明殿學士簽書樞密院事宋少帝旣降元鉉翁隨之北遷至燕日夕悲哭元帝重其節欲使爲大官以示宋時江南舊臣鉉翁固辭不受曰已常事宋義不更仕且亡國之俘無顏立興朝乃聽之時鉉翁家已破且遠在蜀不能歸其學素

長春秋得便居河間府遂以春秋教授河間供衣食文文山北來相見於河間相對大哭賦詩而去至元成宗卽位賜以處士之號而放使歸賜之金帛一無所受還卒於蜀

汪元亮杭人以善鼓琴供奉宋帝宮中宋亡元亮亦從至燕後得歸過河間家鉉翁學士其在臨安舊識也因留鉉翁所數月兩人倡和賦詩皆悲涼慷慨讀者增黍離之哀元亮旣歸以黃冠老見冰雪集序

王倫字正道莘縣人文正公旦弟勗之孫也少好任

俠累官端明殿學士簽書樞密院事紹興九年充
迎梓宮奉還兩宮交割地界使至金金人遣其副
使先歸論歲貢正朔誓表冊等事拘倫以俟報已
而遷之河間不復遣十四年居河間六載矣金欲
以爲平灤三路都轉運使倫曰奉命而來非降也
金益脅以威遣使來趣倫拒益力金杖其使俾縊
殺之倫厚賂使少緩遂冠帶南鄉再拜慟哭曰先
臣文正公以直道輔相兩朝天下所知臣今將命
被留欲污以僞職臣敢愛一死以辱命遂就死於
是河間地震雨雹三日不止人皆哀之詔贈通議

大夫賜其家金千兩帛千疋子述與從兄子遵間
入金境至河間得倫骨以歸官給葬事後謚愍節

金

劉樞通州三河人少以良家子從軍屯河間同輩皆
騎射獨樞刻意經史登天眷二年進士調飛狐令
蔚州刺史恃功貪污無所顧忌屬邑皆厭苦之樞
一無所應乃摭以他事繫獄將致之死郡人有憐
樞者導樞脫走訴於朝會廉察使至守倅而下皆
抵死廢獨樞治入優等遷直大夫

明

李溥咸淳人永樂中隨父榮寓任邱從劉輓講易遂妻其女輓卒溥扶輓歸葬補弟子員舉陝西鄉試復回任邱官至泰安州學正以易爲任邱首倡邑人遂得其傳

段準其先居山東之禹城永樂中自浙之紹興通判調河間有惠政在民其卒也貧不能歸留葬交河李村之原五子從而家焉

郝俊髦灤州人孝友夙著親喪廬墓三年屢試不第選黃縣主簿之任寓河間城內城破不屈死骸骨隨亂骼瘞城外不可別其子時來望祭之孫徵君

奇逢爲之傳

